

# RETSCHERTGA – JAU VOM A L'OPEN AIR, PERQUAI CHE ...

JAU N'HAI USCHIGLIO NAGINS COLLEGAS

MIA MAMMA HA GUDAGNÀ IN BIGLIET TAR RTR

Punts vuleva chattar novas amias e novs amis a l'open air. Novs amis che scrivan per Punts. Sche pussaivel gist sur place. Ma nus eran era conscients (uschè lunsch avain nus anc pensà) – che blers na vulan, na pon u na san (stadi intellectual limità) betg scriver durant in open air. Ma far cruschs è per ils blers anc pussaivel. Perquai avain nus fatg ina pitschna retschertga.

Sa chapescha ch'ina retschertga represchentativa surmuntass nossas capacitads dad in'ediziun spontana. Per nus basta er ina retschertga fitg na-represchentativa cun respostas da 22 persunas tranter 17 e 32 onns. E cun ina dominanza extrema dals umens. Las dunnas han preferì da scriver in text u da s'inscriver en la glista da las novas auturas per las Punts (nus engraziain persunter). Sa chapescha ch'i dat nagina garanzia a respostas sinceras.

## CUN TGI E PERTGE SUN JAU A L'OPEN AIR?

La cumpagnia cun ils amis è definitivamain il motiv principal per vegnir a l'open air. Ils blers vegnan lura er ensemen cun lur collegas. 4 persunas èn a l'open air cun lur famiglia (interpretaziun pussaivla: il frar po era far part da la clicca dals bavaders...) La redacziun da Punts è bain stada uschè naiva ch'ella n'aveva betg pensà da metter l'opziun «per baiver» – quai ch'è dentant vegnì agiuntà individualmain anc da 3 persunas. Per 4 persunas è la musica quai che carmala a l'OAL (Open Air

Lumnezia, per tut quels che n'han anc betg decifrà l'abbreviazion). Era l'opziun da vegnir qua a chattar in ami u in'amia (era sch'igl è forse mo per ina notg) n'è per 2 persunas betg esclusa. A propos ami/amia: sex a l'open air è exclus per 9 persunas, 2 din cleramain gea, per il rest è quai «forse» in tema.

Blers vegnan cun amis e quels amis portan anc auters amis. Quantas novas persunas han noss infurmants gia emprendì d'enconuscher fin la sonda suentermezdi? (Attenziun: en noss temp da facebook cun las roschadas dad uschenumnadas amicizias quintan mo las novas enconuschientschas ch'ins salidass er anc in'emna pli tard): la maioritad (12) na salidass betg dapli che 4 novas persunas l'emna suenter l'OAL, 6 persunas dumbran tranter 5 e 15 novas enconuschientschas e 4 persunas ston tegnair endament ils nums da passa 15 persunas.

Ins va a l'OAL, perquai ch'igl è simplamain gailira, sa chapescha! Or da libra voluntad. (Nus pudessan sa chapescha cumenzar a discutir davart la libra veglia, sche nus giain "mo" perquai ch'igl è genial.) Il sentiment da «perquai ch'ins sto halt bunamain ir» han duas persunas già il curaschi dad inditgar. Ina persuna ha perfin cruschè la resposta «perquai che mia mamma ha gudagnà in bigliet tar Radio Rumantsch». Cordialas gratulaziuns. Nus essan era cuntents che naging sto ir a l'open air, perquai ch'el u ella n'ha uschiglio nagins contacts. Era qua gratulain nus.

## TGE E PER QUANT BLER CONSUMESCH JAU?

Per 15 da las 22 persunas infurmantas è l'OAL la suletta destinaziun openairica da quest onn. 5 persunas visitan dus fin quatter open airs e 2 persunas han questa stad in program bunamain stentus cun 5 u daplirs open airs.

Las entradas per in open air custan ed er ils viadis a quels open airs. Ma quants daners vegnan uschiglio anc sbursads en media durant in festival uschia? 5 persunas na stravagheschan betg e guardan da tegnair lur budget sut 50 francs. Ils blers (12) sa movan en dimensiuns tranter 100 e 200 francs. 5 infurmants dattan ora passa 200 francs, in da quels ha schizunt precisà ed inditgà 400 francs.

Pajar va il bler ensemen cun consumar. Nus na vulain betg savair quanta gervosa che vegn bavida (e forse lura anc far da moralists). Ma en vista a quellas persunas pli u main fittas la sonda, ans interessescha schon anc tge che quellas persunas han bavì sco emprim la sonda damaun – suenter l'emprima saira dad open air. Era qua datti ina gruppia pli gronda: 10 han bavì sco emprim ina gervosa – u era pliras. Il Fux (el vul vegnir numnà explicitamain) ha bavì alcohol, dentant era quai in vin. 6 dals infurmants han sco emprim bavì aua (i n'è dal reminent betg tut las dunnas, mabain mo 4 dad ellas, ina ha bavì gervosa ed in'otra ha bavì in suc da fritgs (la suletta da quella categoria)). Quatter han duvrà in café per vegnir alert ed in ha preferì latg.



## E CO MA PRESCHENT JAU A L'OPEN AIR?

In open air è era la chaschun per sa preschentar in pau – betg il davos vegn mussada la bella pel abbronzada da las vacanzas a la mar. Tschertins sa vestgeschan er a moda fitg extravaganta per dar en egl in pau en la massa – mintgatant era per far reclama per ina u l'autra uniun. L'equipament modic sto en mintga cas constar. Tenor tge devisa sa vestgeschan noss infurmants?

Per 15 persunas è la devisa: pratic e resistant a l'aura. Cler che sche las prognosas da l'aura èn tuttas sin sulegl e cun temperaturas chaudas, po il «resistent a l'aura» er esser in «confurm a l'aura» e muntar tant sco «pauca stoffa». «Liger, pauca stoffa, sexy» è la devisa generala per 2 umens. Per 4 persunas stoi simplamain esser schräg e stravagant. Ina persuna ha amplifitgà las opziuns e sa vestgescha

en general per in open air cun «la mendra vestgadira ch'ei dat». Quai na fa almain era betg donn a la bursa.

Tut en tut pudain nus dir: ina retschertga che na serva a nagut auter che ad emplenir l'ediziun speziala da las Punts. In dals infurmants sa serva ussa da la frasa «Sex a l'open air – in tema?» per far si ina dunna e nus avain la conferma che la musica a l'open air è plitost secundara – cuntrari a la gervosa. In pitschen confiart anc per ils organisaturs: 16 da las 22 persunas pensan er a la lavur organisatorica che stat davos in tal open air.

dal team da PUNTS